



25 April 2016

**PROGRAM JOM BACA 10 MINIT ANAK-ANAK AUTISME**

Pauh Putra, 25 April – Program Jom Baca 10 Minit peringkat negeri Perlis bersama anak-anak istimewa sempena Program Kesedaran Autisme 2016 diharapkan menjadi inspirasi memperkasa tabiat membaca dalam kalangan masyarakat.

Program anjuran Hab Pendidikan dan Latihan Autisme (A-HEART) Universiti Malaysia Perlis (UniMAP) dan Perbadanan Perpustakaan Negara Malaysia Perlis itu diadakan di Auditorium Perpustakaan Tuanku Syed Faizuddin Putra (PTSFP), di sini.

Penyelaras A-HEART yang juga Ketua Pustakawan UniMAP, Mazmin Mat Akhir berkata serentak bulan April adalah Bulan Kesedaran Autisme dan juga Bulan Membaca membuka peluang kepada dua agensi itu bagi meningkatkan kesedaran masyarakat tentang kepentingan pendidikan anak-anak autisme.

“Perbadanan Perpustakaan Negara Malaysia Negeri Perlis dan A-HEART akan terus komited untuk memberi fokus kepada perkembangan bakat anak-anak autisme dengan sokongan pelbagai agensi di Perlis khususnya dan Malaysia amnya.

“Fokus A-HEART sememangnya jelas untuk mendidik dan meningkatkan kesedaran serta kefahaman ahli masyarakat tentang autisme, justeru melalui program ini sebagai salah satu inisiatif daripadanya,” kata beliau ketika berucap di Program Kesedaran Autisme berkenaan.

Turut berkenan berangkat hadir ke program itu ialah Raja Puan Muda Perlis Tuanku Lailatul Shahreen Akashah Khalil selaku Tuanku Pro Canselor UniMAP dan penaung A-HEART.

Hadir sama Setiausaha Kerajaan Negeri, Tuan Ahmad Zamri Khairuddin , Pengarah Perbadanan Perpustakaan Negara Malaysia Perlis, Machita Osman.

Program Jom Baca 10 Minit mula diadakan sejak 2014 merupakan langkah memupuk minat membaca di kalangan masyarakat diadakan serentak seluruh negeri Perlis pada hari ini.

Sebuah buku bertajuk “Chicken Soup for The Soul” sumbangan Perbadanan Perpustakaan Negara Malaysia Perlis digunakan bagi menjayakan program itu dengan penglibatan hampir 15 anak-anak autisme dengan bimbingan sukarelawan A-HEART dan Pusat Perkhidmatan Pendidikan Khas Perlis.

Terdahulu, turut diadakan slot Bicara Buku bertajuk “Aku Bersyukur Anakku Autisme” oleh Pensyarah Kanan Jabatan Pengajian Al-Quran dan Sunnah, Fakulti Pengajian Islam Universiti Kebangsaan Malaysia (UKM) Dr Wan Nasyrudin Wan Abdullah serta ceramah yang disampaikan pengasas bersama penubuhan sekolah autisme pertama pada tahun 2004 di London, Paul Conrathe.

Paul juga adalah pemilik dan Pengarah Urusan SEN Ltd dan Eagle House Group United Kingdom.

**Dikeluarkan Oleh :**

**Aininulniza Mohd Yusof ([aininulniza@unimap.edu.my](mailto:aininulniza@unimap.edu.my))**

Pegawai Perhubungan Media UniMAP